





LISTOVI GRAČANIČKOG KALENDARA

(Od 5.5.1997. do 14.11.1997.)

5. maj 1977.

Počela registracija birača

U okviru priprema za septembarske lokalne izbore koji se, kao i prošlogodišnji državni, održavaju pod nadzorom međunarodne zajednice, odnosno OSCE-a, na području opštine Gračanica počeli su sa radom centri za registraciju birača. To je jedna od najvažnijih operacija u pripremnoj fazi ovih izbora, budući da jedino oni koji se uredno "registruju" mogu izaći na te izbore. Prema odluci OSCE-a, na gračaničkoj opštini uspostavljeno je ukupno pet takvih centara – dva stalna i tri mobilna. Stalni centri su u Gračanici i Donjoj Orahovici, a mobilni u Doborovcima za Doborovce i Džakule, drugi mobilni centar je za Malešiće, Lukavicu i Stjepan Polje i treći za Miričinu, Pribavu, Soko, Vranoviće i Babiće.

Procedura registracije traje šest sedmica i smatra se prilično komplikovanom administrativnom "zavrzlamom" za građane. Zvaničnici, ipak, početni odziv građana "na registraciju" smatraju zadovoljavajućim i očekuju da će ovaj posao s uspjehom završiti.

12. maj 1997.

Susret najviših predstavnika opštine Gračanica i opštine Petrovo

Na inicijativu i uz posredstvo međunarodnih organizacija, u bazi SFOR-a u Sočkovcu, iza zatvorenih vrata, održan je sastanak najviših predstavnika opštine Gračanica i ozrenske opštine Petrovo. Gračanlije je predvodio Muhamed Ibrahimović, opštinski načelnik, a Ozrence Đorđo Ilić, predsjednik povjereništva tamošnje opštine. Prema izjavi Ibrahimovića, koju je dao Radio-Gračanici, razgovaralo se o mogućnostima uspostavljanja nekih vidova ekonomske saradnje između privrednih subjekata dvije opštine.

17. maj 1977.

Javne govornice – znak normalizacije ptt saobraćaja

U sklopu normalizacije PTT saobraćaja, gračanička pošta uspostavlja novu mrežu javnih govornica u gradu. Već su profunkcionisale dvije: jedna na benzinskoj pumpi "Saxa" u ulici Branilaca grada (na dijelu auto-puta Doboj-Tuzla kroz Gračanicu), a druga ispred zgrade PTT u centru Gračanice. U toku je montaža još dvije: na ulazu u Poslovni centar "Evropa" i na benzinskoj pumpi "Kopeks Sarajlić, takođe na autoputu, južno od Gračanice.

Od nadležnih opštinskih organa

gračanički poštari očekuju odgovarajuće papire za lociranje javne telefonske govornice u samom centru grada.

21. maj, 1997.

Ispravljena "granična linija" između privatnog i erarnog šumskog zemljišta

Vijećnici Opštinskog vijeća usvojili su "Odluku o izmjeni Odluke o utvrđivanju graničnih linija između šuma i šumskog zemljišta s jedne strane i poljoprivrednog zemljišta s druge strane i uređenju nove granične linije između spornih šuma i šumskog zemljišta i nespornih šuma i šumskog zemljišta kojima gazduje "Šumarstvo - Svatovac" za 20 katastarskih opština na području gračaničke opštine. Tako je, izgleda, konačno stavljena tačka na dugogodišnji spor između države i mnogobrojnih posjednika šumskog zemljišta, koji nisu imali valjane "tapije", pa im je osporavano formalno vlasništvo na te zemljišne površine.

Povlačenjem takozvane granične linije, brojnim posjednicima šuma, naročito s područja Džakula, Prijekog Brda, Doborovaca i drugih takozvanih trebavskih sela, prije više od dvije decenije osporeno je pravo na šume koje su ostale s onu stranu "granične linije" kao državni posjedi u formalnom vlasništvu šumskih državnih preduzeća. Vođen je višegodišnji spor i sa socijalističkim i sa "demokratskim" vlastima, obijali su se pragovi po odgovarajućim institucijama vlasti po Sarajevu, davata razna

predizborna obećanja... Napokon spor je formalno pravno okončan u korist privatnih posjednika kojima se ovom odlukom konačno priznaje vlasništvo nad spornim šumama.

Ostaje da se provede propisana zakonska procedura za svaki pojedinačni slučaj, što je lakši i završni dio ovog višegodišnjeg spora – na zadovoljstvo mnogobrojnih posjednika pomenutih spornih zemljišnih površina.

21. maj 1997.

Gračanička gimnazija – rasadnik talenata

To potvrđuju i ovogodišnji rezultati koje su gračanički gimnazijalci ovih dana postizali na brojnim kantonalnim i državnim takmičenjima na kojima su "ostvarili pravu žetvu medalja" Izdajamo dva najvrjednija rezultata: Vedad Letić, učenik trećeg razreda, plasirao se u državnu ekipu koja će braniti boje Bosne i Hercegovine na internacionalnoj matematičkoj olimpijadi u Argentini, a Adaleta Hidić, učenica četvrtog razreda plasirala se u državnu ekipu koja će učestvovati na međunarodnoj olimpijadi iz fizike u Kanadi.

Sve čestitke zaslužuju i profesori Tajib Nurikić i Ahmed Hadžiganović.

23. maj, 1993.

Promocija "glasnika"

U sklopu obilježavanja Dana opštine, obavljena je promocija drugog i

trećeg broja "Gračaničkog glasnika" u okviru koje i tribina pod naslovom "Život i djelo Gračanlije Muhameda Mašića". Promociju "Glasnika" biranim riječima obavio je Dr. Halim Mulaibrahimović, dekan Fakulteta političkih nauka iz Sarajeva, a o stvaralaštvu Gračanlije Muhameda Mašića, pored Dr. Mulaibrahimovića, govorili su Mehmedalija eff Hadžić, Dr. Jusuf Žiga, Dr. Husein Kulenović i sin Muhameda Mašića Dr. Izet Mašić, autor knjige "Tarihi Muhameda Mašića", koja je takođe ovom prilikom predstavljena gračaničkoj publici.

24. maj 1997.

Svečanosti povodom Dana opštine

Mnogobrojnim političkim kulturno-zabavnim i sportskim manifestacijama širom opštine obilježen je po drugi puta novouspostavljeni Dan opštine, 25.maj. Sjećanje na taj datum 1992. godine ostat će u trajnom pamćenju kako Gračanlija tako i mnogih drugih žitelja ove opštine...Tada je Gračanica odbila prvi, ali i najžešći napad Ozrenaca, tog su dana herojski pali prvi branioći Bosne na ovom prostoru, rat je ulazio na velika vrata...

Uz prisustvo mnogobrojnih gostiju, održana je svečana akademija na kojoj je prigodan referat pročitao opštinski načelnik Muhamed Ibrahimović, a obavljen je i svečani čin potpisivanja Povelje o bratimljenju između Gračanice i francuskog grada Florija.

Kao i prošle godine, povodom Dana opštine najzaslužnijim pojedincima i organizacijama uručena su visoka opštinska priznanja. Zlatne plakete dobili su: Osman Ahemdbegović, (posthumno), Muhamed Ibrahimović i Reuf Sokolović; Srebrene plakete dobili su: Muharem Ahmedbegović, Hajrudin Džebo (posthumno), Ejub Hodžić, Odbor Islamske zajednice Gračanica i Rukometni klub Gračanica; dobitnici Zlatnih znački su: Ahmet Hamidović, Halid Hadžihasanović, Halil Hadžić, Nedžad Helić, Mehmed Kruškić i Rasim Sakić; dobitnici Srebrnih znački su: Galib Ahmetašević, Bećir Ibrahimović, Fahrudin Kurtović, Husein Serhatlić, Vedad Letić, Idriz Zvorničanin, Hasan Smajić i Ahemd Spahić; Javne pismene pohvale dobili su: "Bošnjakinja" Gračanica, "Fortuna", "Forum žena", Mjesna zajednica Donja Orahovica, Dobrovoljni davaoci krvi Gračanica, Manevarska četa teritorijalne odbrane Doborovci, Osnovna škola Lukavica, Radio-amateri opštine Gračanica, Mjesna zajednica Donja Lohinja, Teritorijalna vatrogasna jedinica Gračanica.

28. maj 1997.

Radio-Gračanica – evropski radio

Radio-Gračanica je bila prva informativna institucija "državnog sektora" u Bosni i Hercegovini koja je počela preuzimati i putem svojih talasa prenositi informativni program Radio "Slobodna Evropa". Ako se zna da se na takve poslovne aranžmane državnih medija

ne gleda blagonaklono u nekim političkim krugovima u Sarajevu, onda se za ovaj čin "gračaničkih radijondžija" i onih koji iza njih stoje, u najmanju ruku može reći da je bio hrabar.

Nakon "Slobodne Evrope", naišavši na podršku i odobravanje prije svega svojih slušalaca, Radio-Gračanica je počela preuzimati i informativne emisije njemačkog Radija Dojče Vele, otvarajući time još jednu kapiju prema Evropi.

30. maj 1997.

Gračanica – primjer međunacionalne tolerancije

U okviru priprema za Četvrtu skupštinu Srpskog građanskog vijeća Bosne i Hercegovine, članovi ove organizacije s područja Gračanice održali su svoju Skupštinu na kojoj su podržali Deklaraciju o ljudskim pravima na političku i nacionalnu ravnopravnost. Pored gostiju, predstavnika Srpskog građanskog vijeća iz Tuzle i Sarajeva, ovom značajnom sastanku gračaničkih Srba prisustvovao je i opštinski načelnik Muhamed Ibrahimović, koji je poželio uspjeh ovoj organizaciji i obavijestio prisutne o nedavnim svojim kontaktima sa predstavnicima srpskih vlasti s "onu stranu Spreče" i pokušajima uspostavljanja mostova privredne saradnje preko rijeke Spreče.

Iz obimne rasprave s ovog skupa izdvajamo riječi Mitra Kuzmanovića iz Gračanice, koji je izrazio nadu da će predstojeća Skupština Srpskog građanskog

vijeća u Sarajevu dati novi impuls ostvarivanju prava na povratak svojim kućama svih prognanih na teritoriji cijele države i riječi Velje Droce, člana najužeg rukovodstva Srpskog građanskog vijeća Bosne i Hercegovine, koji je sa zadovoljstvom konstatovao da je opština Gračanica primjer tolerancije, dobre volje i razumijevanja, posebno "kada je u pitanju oko 300 građana srpske nacionalnosti koji su ostali da žive u Gračanici i to svi u svojim kućama i na svojim radnim mjestima..."

4. juni 1997.

Doboj i Gračanica: otpočeli kontakti i razgovori na najvišem nivou

U bazi Nordijskog bataljona SFOR-a u Sočkovcu, posredstvom i u prisustvu predstavnika međunarodnih organizacija, održan je sastanak čelnika opštine Gračanica i opštine Doboj.

Pokretanje ekonomske saradnje bila je dominantna tema ovog sastanka, ali su dotaknuta i neizbježna pitanja bezbjednosti prolaska kroz Doboj, mogućnosti otvaranja međuentitetske pijace na Poljicu na ulazu u Doboj itd. Dogovoren je novi sastanak za 18. juni i to je, po svoj prilici, jedini opipljivi rezultat ovog susreta.

4. juni 1997.

U "Fortuni" – stanje "nako"

Trenutno uposleno 620 radnika, tokom maja proizvedeno 52.000 pari, dnevna proizvodnja 3.000 pari za Nijemce

i Italijane, ugovorena proizvodnja za sezonu jesen - zima cipela, lon poslovi čija je cijena dosta niža u odnosu na prijeratnu, rezultat – prosječna aprilska plata 250 DM. Malo razloga za zadovoljstvo. Ipak, kažu, na pomolu su bolji dani, a za sada je "nako".

4. juni 1997.

Popova kuća u Gračanici prodata po nalogu Kačavende

Nakon slatkorječivih javnih istupa na Radio-Gračanici, te srdačnih obećanja predstavnicima ovdašnjih vlasti da će pristupiti opravci crkve i popove kuće, namjesnik Srpske pravoslavne crkve za područje Tuzlansko-podrinjskog kantona hadži Nikolaj Marković ipak je prodao popovu kuću u centru Gračanice, teško oštećenu četničkim granatama tokom minulog rata. Ovu dosta "mutnu radnju" izveo je vjerovatno prema uputstvima svog nalogodavca episkopa Tuzlansko-zvorničke eparhije Vasilija Kačavende. Prodaja popove kuće iznenadila je mnoge Gračaničane i izazvala ogorčenje i nezadovoljstvo među gračaničkim Srbima.

5. juni 1997.

Šta sa termomineralnim resursima na području Gračanice?

Na ovo pitanje pokušali su odgovriti eminentni stručnjaci za Okruglim stolom, koji su zajednički organizovali Rudarsko-geološki fakultet iz Tuzle i ovdašnje preduzeće "Terme". Na temu

“Termomineralni resursi na području opštine Gračanica kao osnov podsticaja razvoja malih i srednjih preduzeća”, nakon pozdravne riječi direktora preduzeća “Terme” Hasana Mostarlića i opštinskog načelnika Muhameda Ibrahimovića govorili su: dr. Amir Baraković, dr. Neven Miošić, ing. Muhamed Sijerčić, prof. Osman Pirija, Dr. Nedima Kapidžić-Bašić, dr. Tajib Omeragić.

Ovaj naučni skup bit će od velike koristi svima onima koji će se u narednom periodu baviti pitanjima eksploatacije ovih resursa na području gračaničke opštine. (napomena: najinteresantnije materijale i zaključke sa ovog naučnog skupa objavljujemo u uvodnoj rubrici “Povodom” u ovom broju “Glasnika”)

28. juni 1997.

Registracioni centri prestali sa radom

Time je okončan proces registracije birača za predstojeće lokalne izbore na području gračaničke opštine. U lokalnoj izbornoj komisiji zadovoljni su odzivom punoljetnih građana “na registraciju”. Ostaje im samo još da “odglasaju”. Registrovan je “ravno” 30.001 birač, što je 99% u odnosu na broj građana koji su izašli na prošlogodišnje septembarske izbore.

7. juli 1997.

“...Voda nije skupa...?”

Bilo kako bilo, u Gračanici je ne plaća ni svako deseto domaćinstvo, pa se, izgleda, sve započete investicije u

ovdašnjem Javnom preduzeću “Vodovod” moraju stopirati, a u ovim vrelim julskim danima vode je sve manje, pogotovo u visinskim dijelovima grada. Glavni uzrok: gubici u “troljavoju” gradskoj vodovodnoj mreži. Od fakturisanih 450.000 DM u “kategoriji domaćinstava” naplaćeno je svega 8%, a u “kategoriji privrede” od fakturisanih 250.000 DM, naplaćeno je 60%, prosjek – mršavih 21%. Raspravljalo je o ovome i Opštinsko načelstvo, najavljuju se i neke radikalne mjere kao što je prinudno zavrtnje slavina “zaboravnim” potrošačima i ilegalcima. Samo je pitanje – kako to izvesti.

9. juli 1997.

Mali privredni raport

Proces oživljavanja privrede odvija se na području opštine Gračanica zadovoljavajućim tempom. Ukratko: u “Fortuni” radi oko 850 radnika, proizvodnja se polahko zahuktava i u “Olimpu”, “Jadrina” radi u dvije smjene, “Fering” se priprema za ozbiljnije poslove, “Graplast” pokušava preći na pakovanje jestivog ulja u saradnji sa jednom slovenačkom firmom, “Gračanka” pokušava da osvoji program prženja i pakovanja luka, radi više od 10 peradarskih farmi, u fazi je pilot projekat za izgradnju sportsko-rekreacionog centra “Terme”... Privatni sektor zahuktava se daleko brže, lakše savlađuje postratne teškoće, a više su mu naklonjeni i strani kreditori. Međutim, tempo zapošljavanja zaostaje za tom dinamikom...

14. juli 1977.

Nove stare i nove sudije u Opštinskom sudu u Gračanici

Predsjednik Kantonalnog suda Tuzla imenovao je sedam sudija Opštinskog suda u Gračanici i to četvero dosadašnjih: Ahmeta Hamidovića, Reufa Džinića, Nerminku Begović i Huseina Šerbečića i troje novih: Melihu Hadžihasanović, Nerminku Mujkić i Sabiru Baraković. Za predsjednika Opštinskog suda Gračanica imenovane sudije izabrale su dosadašnjeg predsjednika Ahmeta Hamidovića. Time je okončana zakonska procedura imenovanja i kadrovska konsolidacija ovdašnjeg Opštinskog suda. Isti postupak u toku je i u ostalim opštinama Kantona.

15. juli 1977.

Sanirani školski objekti u Miričini i Stjepan Polju

Prigodnim svečanostima u osnovnim školama Miričina i Stjepan Polje, u prisustvu brojnih gostiju, označen je završetak sanacije ratnih šteta na tim objektima koji su pretrpjeli značajna oštećenja tokom minolog rata. U Miričini je ujedno obilježena i 60. godišnica postojanja škole u tom selu.

25. juli, 1997.

Putevi zavičaja – nikad gori

To je najkrupniji problem takozvane komunalne infrastrukture na području opštine. Riječ je o 180 kilometara lokalne putne mreže za koju ni stariji ne pamte kada je bila u lošijem stanju. Međutim, i na regionalnom putu Gračanica – Srnice saobraćaj je često u prekidu zbog klizišta, a svakodnevno je otežan zbog potpune oštećenosti kolovoza duž čitave trase, pa čak i na samom ulazu u Gračanicu kroz Sklop Pašalići. Slično je stanje i na putu Bukva – Sladna, koji je asfaltiran pretpošle i prošle godine.

U opštinskoj kasi, međutim, para nema ni za običnu krpažu, akamoli za neke ozbiljnije zahvate. Stoga postoji realna opasnost da neka područja opštine budu odsječena od svog "administrativno-političkog" središta. Hoće li se opet uvoditi samodoprinosi za održavanje lokalnih puteva, ma koliko to bilo anahrono i nepopularno...?

8. avgust 1997.

Političke partije na "instruktaži" kod OSCE

Na septembarske lokalne izbore u gračaničkoj opštini prijavljene su sljedeće političke grupacije, odnosno stranke: Socijal-demokratska partija BiH, Liberalno-bošnjačka stranka BiH, Patriotska stranka BiH, Bosanska stranka,

Demokratska stranka invalida, Bosanska demokratska unija, samostalni kandidat Ekrem Kamarić i Koalicija za Bosnu i Hercegovinu koju čine Stranka demokratske akcije, Stranka za BiH, Liberalna stranka BiH, i Građanska demokratska stranka BiH.

Budući da se i ovi izbori održavaju u organizaciji međunarodne zajednice, ovih dana održavaju se sastanci sa predstavnicima političkih partija na kojima predstavnici OSCE-a prenose "pravila igre" koja propisuje Privremena izborna komisija. Insistira se na dostavljanju sedmičnih planova predizborne kampanje i dosljednom poštovanju pomenutih pravila. U protivnom, slijede sankcije.

U gračaničkoj opštini bit će "instalirana" 24 biračka mjesta, 21 redovno i tri biračka mjesta za takozvano glasanje u odsustvu.

12. avgust 1997.

Svaki peti stanovnik opštine Gračanica ima vozačku dozvolu

U prvih sedam mjeseci prošle godine desila se 71 saobraćajna nesreća ili nezgoda, u prvih sedam mjeseci ove godine desile su se 124 nesreće ili nezgode, 5 je lica poginulo (samo u augustu troje), a 41 zadobilo teže ili lakše povrede, na opštini ima 11.000 šofera svih kategorija, samo u prvih šest mjeseci ove godine na opštinske drumove izašlo još 1.598 četvoročekaša registrovanih u ovdašnjem MUP-u. To su podaci iz redovnih policijskih izvještaja na osnovu kojih se može zaključiti da je stanje bezbjednosti saobraćaja u ovoj godini duplo gore u odnosu na isti period


prethodne. Uzroci su standardni: loši putevi, saobraćajna nedisciplina i nekultura, tehnička neispravnost motornih vozila, alkohol, niske kazne itd. Da bi se stanje popravilo, mnogi takozvani faktori moraju "odraditi" svoj dio posla.

Očigledno, nije sve do policije.

16. avgust 1997.

Otvorena nova džamija u Malešićima

Nekoliko hiljada vjernika prisustvovalo je prigodnim vjersko-kulturnim manifestacijama koje su organizovane tim povodom. Otvaranju džamije prisustvovali su mnogi visoki gosti, među kojima i Reis ul-ulema dr. Mustafa eff. Cerić.



Iako nedovršena, i ova džamija tokom rata bila je meta četničke artiljerije. Njeno dovršenje i sanacija na simboličan način označava početak sveopšte obnove čitavog ovog kraja. To je samo jedan od akcenata iz vrlo nadahnutog izlaganja dr. Cerića na ovom veličanstvenom skupu.

izgrađenoj džamiji u Babićima (džemat Mustafići od oko 250 domaćinstava), čija je gradnja počela još 1988. godine. Izgradnja munare počela je u julu, a završena u augustu 1991. godine. Tokom rata džamija je bila meta četničkih granata, ali srećom nije pogodoena.

29. august 1997.

Puštena u rad nova "Vega fruit"

Nakon četiri mjeseca gradnje, u pogon je puštena nova moderna fabrika "Vega fruit" u Brijesnici (Doboj Istok). Prisustvovali su mnogobrojni gosti iz svijeta biznisa i politike, izrazili svoje divljenje i čestitali ekipi Muharema Salihbašića, koja je, startujući u Gračanici u nemogućim ratnim uslovima, bukvalno sa ledine, od običnog kazana za "upjecanje" pekmeza, dogurala do super-moderne fabrike sa 350 radnika, godišnjom proizvodnjom od 9.000 tona prerađenog voća i povrća, vrijednom 12 miliona DM, izvozom od 500 hiljada DM...

Primjer za ugled u teškom periodu naše sveopšte poslijeratne obnove.

7. septembar. 1997.

Otvorena džamija u Babićima, džemat Mustafići

Nakon Donje Lohinje i Malešića otvorena je još jedna džamija na području gračaničke opštine. Riječ je o novo-



Više hiljada građana prisustvovalo je njenom otvaranju. Brojni visoki gosti iz vjerskog i političkog života Gračanice, Tuzle i Sarajeva pohvalili su džematlije Mustafića koji su vlastitim trudom i sredstvima izgradili ovu džamiju, čestitali im njen završetak i otvaranje. Između ostalih, govorio je i profesor Muharem

Omerdić ispred Rijaseta Islamske zajednice BiH, posebno naglasivši ulogu imama u odbrani zemlje. "Tokom rata agresor je porušio 618 džamija, pet stotina mekteba i 400 mesdžida u Bosni i Hercegovini. Mi danas, evo, gradimo i veće i bolje", naglasio je Omerdić.

Pošto je proučena dova, efendinica Hanifa Mešanović simbolično je otvorila džamiju u Mustafićima.

13. septembar, 1997.

Izbori lokalni, posljedice globalne

Lokalni izbori u Bosni i Hercegovini, održani 13. i 14. septembra (iako u mnogim opštinama za njih nisu postojali ni minimalni uslovi), po svemu sudeći, mogli bi uzrokovati i neka globalna društvena i politička pomjeranja u Bosni i Hercegovini.

Na opštini Gračanica glasalo se na 27 glasačkih mjesta, od kojih se na tri glasalo u takozvanom odsustvu i to u Gračanici, Doborovcima i Lukavici.

Pošto je obavljeno obavezno ponovno registrovanje birača, na području opštine Gračanica "izbrojano je" ukupno 26.803 građana s pravom glasa, a glasalo je 23.757 ili 88,6% birača. Oni su zaokruživali jednu od 6 političkih partija, Koaliciju za BiH (SDA, Stranka za BiH, Građanska i liberalna) i jednog nezavisnog kandidata. Izbore su nadgledala 24 međunarodna supervizora i 144 posmatrača političkih stranaka i udruženja građana. Što se tiče ove opštine, izbori su

protekli u najboljem redu, ali se i ovdje, kao i na drugim mjestima, pozadugo moralo čekati na rezultate izbora, jer su, izgleda, takozvani međunarodni supervizori sporo "zbrajali glasove".

7. oktobar 1997.

"Savršeni krug" pred gračaničkom publikom

Ovaj prvi poslijeratni bosanskohercegovački film, za koji je scenario napisao Abdulah Sidran, a režirao Ademir Kenović, gračaničke "kindžije" prikazuju već nekoliko dana, ali i pored velikog interesovanja publike, nisu zadovoljni "učinkom". Na deset redovnih predstava došlo je "svega" 688 posjetilaca, što je ispod očekivanja ako se ima u vidu kvalitet filma i uspjeh koji postiže u inostranstvu. Zašto? Odgovara ima i nema.

8. oktobar 1997.

Počela izgradnja fabrike stočne hrane

Riječ je o fabrici, kapaciteta 12.500 tona stočne hrane godišnje, koja se gradi na lokaciji Grabovac, u blizini karanovackog mosta. Fabriku, koja već ima naziv "Bioprodukt", grade gračaničke firme "Agrozem", "Kokaprodukt" i "Lidoosiguranje, te "Ratar" i Agroagora" iz Brke – vlastitim sredstvima i sredstvima međunarodnog kredita. Ovaj kapacitet bit će u funkciji stočarske, a posebno peradarske proizvodnje na opštini koja tek treba da proradi punim kapacitetom.

8. oktobar 1997.

Rezultati lokalnih izbora: koalicija i SDP dijele vlast

Nakon zbrajanja pridodatih glasova iz inostranstva i sa glasanja u odsustvu u

drugim opštinama, Privremena izborna komisija napokon je objavila konačne rezultate glasanja na lokalnim izborima 13. i 14. septembra za opštinu Gračanica. Izborne rezultate po mjesnim zajednicama, odnosno biračkim mjestima i "plasman" pojedinih političkih stranaka i grupacija u njima kao i na nivou opštine pokazuje sljedeća tabela:

Rezultati lokalnih izbora na opštini Gračanica 1997.

Biračko mjesto (MZ)	Ukup. birača	Glas- alo	Važ. glas.	BROJ GLASOVA PO STRANKAMA							
				BPS	BDU	LBO	SDP	BOSS	DSI	K. CD	EK
Babići	1036	913 88%	867 64%	16 18%	23 2,60%	13 2,40%	121 13,90%	24 2,70%	20 2,30%	643 74,0%	7 0,80%
Doborovci	1199	1081 90%	1036 86%	6 0,5%	27 2,6%	18 1,7%	88 8,4%	36 3,5%	41 4,0%	802 77,4%	18 1,7%
Džakule	1435	1303 90,8%	1256 96,4%	10 0,8%	20 1,6%	9 0,7%	55 4,4%	26 2,1%	26 2,1%	1097 87,3%	13 1,0%
Gračanica	8093	6810 84,1%	6563 96,4%	112 1,7%	114 1,7%	230 3,5%	2058 31,4%	189 2,9%	152 2,3%	3148 48,0%	110 1,7%
Lohinja	541	482 89%	446 82%	15 3,4%	6 1,3%	11 2,5%	66 14,8%	3 0,7%	8 1,8%	327 73,3%	10 2,2%
Lukavica	1473	1473 100%	1348 92%	12 0,9%	34 2,5%	7 0,5%	258 19,1%	60 4,5%	46 3,4%	916 68,0%	15 1,1%
Malešići	1561	1418 91%	1349 89%	19 1,4%	44 3,3%	12 0,9%	183 13,6%	46 3,4%	45 3,3%	991 73,5%	9 0,7%
Donja Orahovica	2397	2061 86%	1964 82%	33 1,7%	81 4,1%	20 1,0%	462 23,5%	72 3,7%	51 2,6%	1221 62,2%	24 1,2%
Gornja Orahovica	1183	1020 86%	979 83%	7 0,7%	26 2,7%	17 1,7%	194 19,8%	43 4,4%	26 2,7%	655 66,9%	11 1,1%

Miričina	1409	1279 91%	1214 86%	14 1,2%	27 2,2%	21 1,7%	566 46,6%	22 1,8%	17 1,4%	538 44,3%	9 0,7%
Piskavica	381	348 91%	331 87%	3 0,9%	5 1,5%	7 2,1%	86 26,0%	8 2,4%	6 1,8%	212 64,0%	4 1,2%
Prijeko Brdo	366	366 100%	355 97%	1 0,3%	11 3,1%	4 1,1%	15 4,2%	10 2,8%	12 3,4%	300 84,5%	2 0,6%
Pribava	904	811 90%	756 84%	28 3,7%	23 3,0%	36 4,8%	129 17,1%	33 4,4%	34 4,5%	463 61,2%	10 1,3%
Rašljeva	415	389 94%	365 88%	1 0,3%	17 4,7%	5 1,4%	82 22,5%	23 6,3%	10 2,7%	224 61,4%	3 0,8%
Soko	1038	944 91%	870 84%	10 1,1%	28 3,2%	9 1,0%	141 16,2%	42 4,8%	27 3,1%	595 68,4%	18 2,1%
Stjepan Polje	2026	1811 89%	1717 85%	149 8,7%	48 2,8%	41 2,4%	158 9,2%	46 2,7%	30 1,7%	1231 71,7%	14 0,8%
Vranovići	599	566 94%	533 89%	10 1,9%	18 3,4%	9 1,7%	67 12,6%	21 3,9%	20 3,8%	381 71,5%	7 1,3%
Škahovica	747	682 91%	650 87%	9 1,4%	12 1,8%	11 1,7%	104 16,0%	30 4,6%	8 1,2%	468 72,0%	8 1,2%
UKUPNO	26803	22599 100%	23757 84,30%	455 2,01%	564 2,54%	480 2,12%	5283 23,37%	734 3,25%	579 2,56%	14212 62,86%	292 1,29

Objašnjenje skraćenica u tabeli:

BPS - Bosanskohercegovačka patriotska stranka, BDU - Bosanska demokratska unija, LBO - Liberalno-bošnjačka organizacija, SDP - Socijal-demokratska partija, BOS - Bosanska stranka, DSI - Demokratska stranka invalida, KCD - Koalicija za cjelovitu i demokratsku Bosnu i Hercegovinu (SDA, Stranka za BiH, Građanska demokratska stranka, Liberali BiH), EK - Samostalni kandidat Ekrem Kamarić.

U prethodnom postupku registracije birača za ove izbore građani su se mogli registrovati za glasanje na bilo kojem od utvrđenih glasačkih mjesta na opštini, a to

znači da se stanovnik s biračkim pravom iz jedne mjesne zajednice, mogao registrovati (prijaviti za glasanje) i glasati u drugoj mjesnoj zajednici. Međutim, kako se pretpostavlja da je takvih slučajeva bilo malo, za objavljene rezultate glasanja može se reći da gotovo stopostotno odražavaju političko raspoloženje građana po pojedinim glasačkim mjestima, odnosno mjesnim zajednicama.

Prema konačnim rezultatima glasanja, od ukupno 30 mjesta u Opštinskom vijeću Gračanica, Koalicija za cjelovitu i demokratsku Bosnu i Hercegovinu dobila je 21, Socijal-demokratska partija 8 i

Bosanska stranka 1 mjesto.

Dok Socijal-demokratska partija izražava zadovoljstvo postignutim rezultatima, naročito na području grada Gračanice, unutar Koalicije za cjelovitu i demokratsku Bosnu i Hercegovinu već se izražavaju nesuglasice oko podjele vlasti. Potvrđuju se, naime, predviđanja da će upravo taj završni dio borbe za osvajanje opštinske vlasti biti zanimljiviji i od samih izbora.



11. oktobar 1997.

Otvorena Bijela Ahmed-pašina džamija u Gračanici

Nizom vjerskih i kulturno-umjetničkih manifestacija, tokom 10. i 11. oktobra, u Gračanici je obilježen završetak radova na izgradnji munare i opravci

Budimli Ahmed-pašine džamije koja je srušena 9. oktobra 1995. godine posljednjom granatom, ispaljenom sa Ozrena, neposredno pred zaključenje primirja, a zatim i mira. Uspravljena je za relativno kratko vrijeme, jer su tako htjeli stanovnici ovoga grada. Od manifestacija izdvojamo kulturno-umjetnički program ispred Osman-kapetanove medrese (9.10.1997.) koji su izveli učenici i nastavnici Prve osnovne škole u Gračanici. Uručene su i nagrade učenicima za najbolje likovne i literarne radove o Bijeloj džamiji. Između akšama i jacije (10.10.1997.) u Bijeloj džamiji je izveden prigodan mevludski program u kojem je učestvovao hor iz Tuzle. Prisutnima su se obratili Fikret eff. Pašanović i muftija tuzlanski Husein eff Kavazović.

Među mnogobrojnim visokim gostima, koji su 11.10.1997 godine. došli da podijele ovu veliku radost sa Gračanlijama, bio je i Reis-ul-ulema dr. Mustafa eff. Cerić. Uz čestitke svima onima koji su doprinijeli da ova džamija ponovo bljesne u svom punom sjaju, bjelini i čistoći, dr. Cerić je u svom neuobičajeno kratkom govoru istakao nekoliko krupnih zadataka koji stoje pred sadašnjim generacijama Bošnjaka muslimana, među kojima je poseban naglasak dao na odgoj i obrazovanje.

Imajući u vidu aktuelnost poruka koje u sebi sadrži, govor dr. Cerića objavljujemo u cjelini kao uvodnik ovom broju našeg časopisa.

13. oktobar 1997.

Obnova Pravoslavne crkve u Gračanici

Prije nego što su poletjele prve granate sa Ozrena na Gračanicu, ovaj grad i ovu crkvu napustio je njen protojerej Rade Grujić, do tada uvaženi građanin ovoga grada. Za njim je otišao i dobar dio "pastve", pa o crkvi nije imao ko da brine. Krov crkve pogođen je haubičkom granatom sa Ozrena, kalibra 155 milimetara 1994. godine, a sličnu sudbinu doživjela je i popova kuća u centru grada. Ostatke kuće sa dvorištem, po nalogu više crkvene instance, nedavno je prodao hadži Nikolaj Marković, sveštenik iz Tuzle, koji sada organizuje saniranje crkve u Gračanici.

Na pitanje novinara Radio-Gračanice, ko je pogodio Pravoslavnu crkvu u Gračanici, a ko je porušio džamije u Doboju, Bijeljini i drugim gradovima, hadži Marković je odgovorio: "Zna se."

20. oktobar 1997.

Posljednje okupljanje "starih" vijećnika

Bio je to sastanak kojim je na simboličan način označen završetak mandata dosadašnjeg saziva Opštinskog vijeća Gračanica. Nakon punih sedam godina "vladanja", od kojih pune četiri u uslovima agresije i rata, ovom sazivu opštinskih odbornika, odnosno vijećnika, eto, "rastanak se primakao..."

Prigodan referat pod naslovom "Mjesto i uloga Skupštine opštine, Ratnog predsjedništva i Opštinskog vijeća od izbora 1990. do danas" pročitala je dosadašnji sekretar Vijeća gospođa Meliha Hadžihasanović, a tople riječi zahvalnosti na saradnji svim svojim kolegama vijećnicima uputio je predsjedavajući Opštinskog vijeća Halid Hadžihasanović i dodijelio im za uspomenu prigodne poklone. U sličnom tonu govorili su: Hazim Vikalo, predsjednik Vlade TPK, koji je od pomenutih sedam bio na čelu ove opštine šest godina, zatim aktuelni opštinski načelnik Muhamed Ibrahimović, te Reuf Sokolović, Jusuf Nurkić, Amira Bravić, Rusmir Djedović, Ejub Hodžić i Mustafa Tinjić.

Imajući u vidu da sa političke scene, na neki način, odlaze ljudi koji su u najtežim danima rata ne samo simbolizovali, već i "odradili" legalitet i legitimitet vlasti Bosne i Hercegovine na ovom području, višak patetike i "sentimenta", koji se ispoljio na njihovom posljednjem zajedničkom okupljanju, nije pokvario dostojanstvo tog skupa. Naprotiv.

Vrijedi zabilježiti još jednu poruku: da ni jedan parlament na svijetu ne radi u uslovima u kakvim je radio njihov – koji nakon svega odlazi u istoriju ili zaborav. Zavisi, kako se uzme...

20. oktobar 1997

Dogovor stranaka oko podjele vlasti

Održan zajednički sastanak svih političkih stranaka koje imaju vijećnike u

Opštinskom vijeću. Dogovoreno je da SDA kandiduje načelnika opštine i sekretara opštinskog vijeća, Stranka za BiH predsjedavajućeg Opštinskog vijeća, a SDP zamjenika predsjedavajućeg Opštinskog vijeća. Potpisivanje međustranačkog protokola predviđeno je za naredni sastanak, a održavanje konstituirajuće sjednice Opštinskog vijeća za 8. novembar 1997.

20. oktobar 1997.

Otvoren tehnički pregled vozila u Gračanici

Njegova izgradnja i puštanje u rad u okviru preduzeća "Transport" od velike je važnosti za gračaničku opštinu, odnosno 6,5 hiljada vlasnika motornih vozila koji su tehničke preglede do sada obavljali u susjednim opštinama. "Naše preduzeće počinje da živi opet iznova, jer je naša imovina, objekat sličan ovome, autoservis i sve drugo u vrijednosti od 6 miliona DM ostalo na onoj strani Spreče, ali mi se nismo dali", rekao je direktor Zlatko Čehajić, na skromnoj svečanosti, povodom otvaranja ovog objekta.

Stanica za tehnički pregled vozila zadovoljava evropske standarde i u startu zapošljava 10 radnika. Izgrađena je u rekordnom roku, za nepuna 4 mjeseca, uz odricanje radnika "Transporta" i angažovanje kreditnih sredstava. Iskazana je i zahvalnost preduzeću "Jadrina", koja je ustupila zemljište za gradnju po izuzetno povoljnim uslovima.

Na simboličan način objekat je otvorio opštinski načelnik Muhamed Ibrahi-

mović.

Sada je na redu autobaza i upošljavanje svih radnika.

"Transport" je već "ubacio" u treću i ide dalje.

22. oktobar 1997.

Dilema u "Parku": šta sa Motelom?

Ugostiteljsko preduzeće "Park" spada među najveće ratne stradalnike u strukturi gračaničke privrede. Od 11 ugostiteljskih objekata, koji su mu radili prije rata, sada su u funkciji samo tri. Motel na južnom ulazu u Gračanicu najviše je oštećen, oko 85% u odnosu na njegovu ukupnu vrijednost – i što je najgore, još uvijek propada. Rukovodstvo preduzeća uporno pokušava da nađe neko rješenje za Motel. Dilema je, međutim, da li pristupiti zajedničkom ulaganju s nekom drugom firmom, pri čemu bi "Parkovo" učešće bilo zemljište i ostatak vrijednosti objekta ili izvršiti njegovu prodaju i sredstva usmjeriti za dovršenje gradskog hotela. Budući da u strukturi preduzeća preovlađuje državni kapital, u razrješavanju ove dileme, a samim tim i "spasavanju" Motela, rukovodstvo firme s pravom očekuje pomoć i podršku opštine i Kantona.

22. oktobar 1997.

Uvođenje konkurencije u javnom gradskom saobraćaju

To je potez koji je pod pritiskom opravdanih, ali i onih "drugih" zahtjeva iz

većeg broja sela, uz saglasnost kabineta opštinskog načelnika, povukao Sekretarijat za poslove uprave, privredu i finansije i na takozvanom lokalnom usklađivanju redova vožnje, osim "Avisa", koji je na neki način uživao ekskluzivitet, (ali i određene obaveze), u lokalni javni saobraćaj na opštini uveo još nekoliko privatnih pravnih i fizičkih lica, odnosno njihovih vozila i "ovjerio" im redove vožnje. Hoće li doći do nepotrebnog "guranja" i nelojalne konkurencije na ionako skučenom tržištu ili će doći do prekretnice u opštinskom javnom saobraćaju od koje će putnici imati neku "fajdu", ostaje da se vidi.

29. oktobar 1997.

"Olimp" obezbijedio posao za narednu sezonu

"Oko 500 radnika ove renomirane tvornice ima obezbijeđen posao za narednu sezonu", izjavio je direktor "Olimpa" Fikret Džinić novinaru Radio-Gračanice. Potpisan je ugovor sa njemačkom firmom "Gebruder-vajs" za proizvodnju i isporuku 8.000 sakoa i 15.000 prsluka na njemačko tržište. U "Olimpu" se intenzivno radi na poslovnom povezivanju sa još nekim firmama na zapadnoevropskom tržištu.

6. novembar 1997.

Dogovori oko podjele vlasti se nastavljaju

Na petom po redu zajedničkom sastanku političkih stranaka koje imaju vi-

jećnike u opštinskom vijeću postignut je samo dogovor da se konstituirajuća sjednica opštinskog vijeća održi 14. novembra, a da se do tada postigne dogovor unutar Koalicije za cjelovitu i demokratsku BiH koja će stranka kandidovati opštinskog načelnika – SDA ili Stranka za BiH.

14. novembar 1997.

Novo vijeće – stari (novi) načelnik

Imali su pravo posmatrači i dobri poznavaoči lokalne političke scene kada su tvrdili da će postizborna "borba za vlast", a posebno za funkciju opštinskog načelnika, biti zanimljivija i od samih izbora. Neuobičajeno dugo, i ko zna zašto, bila je to top-tema u čaršiji, ali i na mnogim zvaničnim i nezvaničnim sastancima "dijem opštine". Prvo se moralo razigrati unutar SDA, a zatim i unutar same Koalicije za cjelovitu Bosnu i Hercegovinu i - najzad na konstituirajućoj sjednici Opštinskog vijeća. Ako je u prethodnom postupku usaglašavanja oko podjele vlasti bilo na momente i niskih udaraca pa i faulova, za konstituirajuću sjednicu Opštinskog vijeća mogu se izreći vrlo visoke ocjene i pohvale.

Protekla je dostojanstveno, pomalo u svečarskom, ali i u konstruktivnom tonu, za što komplimente zaslužuju kako vijećnici vladajuće Koalicije, tako i vijećnici SDP kao opozicije.

Za novog opštinskog načelnika velikom većinom glasova izabran je stari načelnik

Muhamed Ibrahimović, a za njegovog zamjenika Besim Duraković (dosadadašnji sekretar Sekretarijata za privredu, opštu upravu i finansije), oba kandidati SDA. Uz prethodni politički dogovor, funkcija zamjenika opštinskog načelnika (kao nova) uvedena je promjenom Statuta Opštinskog vijeća koja je potvrđena u prvom dijelu ove konstituirajuće sjednice. Za zamjenika predsjedavajućeg Opštinskog vijeća, takođe, tajnim glasanjem izabran je Midhat Alić, kandidat sa liste SDP.

Stranka za BiH (koja je zahtijevala funkciju načelnika), nije prihvatila ponuđeno mjesto predsjedavajućeg Opštinskog vijeća, pa je ta funkcija do daljnjeg ostala nepopunjena, kao, uostalom i funkcija sekretara Opštinskog vijeća. Popunu Kabineta, odnosno izvršne vlasti obaviti će opštinski načelnik na osnovu postignutih stranačkih dogovora i svojih zakonskih ovlaštenja.

Strukturu novog Opštinskog vijeća pokazuje sljedeća tabela:

R.br.	Stranka	Nacionalna struktura		Struktura po mjestu stan.		Polna struktura	
		Bošnjaci	Ostali	Selo	Gračanica	Muškarci	Žene
1.	SDA	14		7	7	14	
2.	St. za BiH	4			4	3	1
3.	Liberali	2		1	1	2	
4.	GDS	1			1	1	
5.	BOSS	1			1	1	
6.	SDP	8		2	6	7	1
UKUPNO		30		10	20	28	2
	Koal. CD	21		8	13	20	1